

金光明經文句卷第四

磻九

隋天台智者大師說

門人灌頂錄

釋空品

夫空者應有四種謂滅色入空即色是空滅
 邊入空即邊是空補九此經通諸乘懺悔應須四
 種空而今品但標空者專是即邊而空也何
 故爾經云無量餘經已廣說空是故此中畧
 而解說也又空者空有空無空有者空二十
 五之塊有空無者空二乘之灰無兩邊清淨
 名之為空直作此說惑者迷名濫理不能超
 悟今作六句分別空破非有非無非有非無
 破空空修非有非無非有非無修空空即非
 有非無非有非無即空空破非有非無者所
 謂凡邪非有非無見二乘偏住非有非無證

別教教道執非有非無門悉為空品空所破
 也凡邪之見多種一單四見二複四見三具
 足四見單四見可解複四見者謂有有無
 無有無無亦有亦無有亦有亦無無非有非
 無有非有非無無此是複四見具足四見者
 於一句中具有四句四四十六句故名具足
 也雖單複具足皆苦集浩然雖計為非有非
 無實是妄見故為空品空所破也二乘偏住
 非有非無證者斷常見故言非有斷斷見故
 言非無有無二見滅無餘三界見思永已盡
 生滅度想生安隱想梵行已立所作已辦不
 受後有保此而已不復進求三菩提但二乘
 發真斷常見斷斷見其門不同或從有門入
 如阿毘曇或從無門入如成實論或從亦有
 亦無門入如毘勒或從非有非無門入如那

陀迦旃延經離斷離常名聖中道四門俱斷
斷常名同中道實是保偏取證故爲空品空
所破也別教教道執非有非無門者佛爲鈍
根菩薩方便權巧作四門說中道如彼棧喻
不得意者四門成諍故涅槃云真善妙有大
般涅槃空佛性亦色非色非色非非色若各
執一門則於如來有諍訟心不見中道執此
教門猶爲空品空所破也新本云初地菩薩
欲行有相道斯即一門之意也文中悉有四
門之說大經云自此之前我等悉名邪見人
也非有非無破空者還是凡邪之空見二乘
之空證教道之空門墮在二邊故爲中道非
有非無所破也相修者見空證空教道空應
修中道非有非無也非有非無見非有非無
證非有非無教門應修中道空也相即者破

二邊空即是中道非有非無中道非有非無
即是破二邊空無二無別般若是一法佛說
種種名空即是非有非無而不以非有非無
爲名者爲略說故言空品也此品來意者
懺品破惡讚品生善空品導成滅惡生善也
亦是導成用宗體等故釋論云若以無此空
一切無所作導成上品故明空品也又常果
顯體滅惡生善非不明空利者已解爲鈍根
故起大悲心更明五陰生法本性空寂爾此
品有四十五行偈分爲二初四行半敘欲說
空次四十行半正說空無量餘經者指廣而
明略亦是標略以顯廣若指般若則此經非
方等攝若不指般若若諸經不廣明空義此復
云何答諸經前分結集人應作次第而其後
分皆攝入前例且舉一以類諸如阿舍經云

佛將涅槃舍利弗不忍見佛滅前佛而去均頭頭擎衣鉢來至佛所此是窮後之事而在十二年前阿舍中集當知阿舍後分至涅槃也又方等次第在法華前而云先於靈山已為聲聞授記豈非方等至於涅槃又大品次第在法華前釋論云須菩提於法華中授記故而諸菩薩為畢定為不畢定當知般若亦至涅槃以此推之言次第者是前分也互相指者是後分也結集者以後分明義氣類若同向前集之或者不知言乖次第實不乖也此經屬方等後分指般若為廣說於義無妨略而解說者佛有略廣二門應作四句分別或名義俱廣如十八空二十空二十四空是也或名義俱略如一獨空是也或名廣義略如法性實相實際如如法界等眾多名共名

一義是也或名略義廣如生法二空之名而義大廣迄從凡地至于極佛皆名眾生釋論云眾生無上者佛是從凡夫之五陰極至佛地亦稱色解脫受想行識解脫釋論云法無上者涅槃是今言略說生法二空下文云五陰舍宅觀悉空寂善女當觀可處有人及以眾生即其義也眾生根鈍者根緣不同或廣說得悟名利根或略說得悟名鈍根此語似倒身子一聞得悟是略是利目連再聞得悟是廣是鈍此經意不就得悟邊明利鈍乃是聞持邊論利鈍利人廣聞則能持鈍人略聞方能持今機但有得悟之機無有廣持之機故言不能廣知也無量空義者二乘真諦是有量空義菩薩中道是無量空義此經明法性實相即是無量空義也異妙方便者即是

悉檀方便巧作上來辨果明因滅惡生善種種分別等是也起大悲心者一段衆生著有病重故大悲亦重也我今演說者演名爲廣與略相違上論生法二空是名略今論生法二義故言演爾知衆生意者知此一機樂略宜略對略悟略故言知意也敘欲說空意竟從是身虛僞下四十行半偈是第二正明於空又爲二初從身僞下十九行半明生法二空境二從善女當觀下二十一行明生法二空觀無境觀不正無觀境不顯應引止觀中十番檢境智明不可思議下文云不可思議智境不可思議智照新本云如如法如如智即其義也明空境又二初從是身虛僞下十七行半明實法境二從水火風種下二行明假想境實法者觀五陰無法觀十六無人空

攝九

五

觀詣理故名實法身雖未死虛假臭穢故名假想亦名慧行行行緣空直入名爲慧行帶事兼修名爲行行亦名正道助道空觀順理名爲正道不淨破貪名爲助道小乘修正道斷結名慧解脫人修助道斷結名俱解脫人大品明菩薩發心與薩婆若相應者是修正道遊戲神通淨佛國土者是修助道法華名爲大車儻從即此意也涅槃明正慧遠離遠離十相住大涅槃又諦觀白骨破二十五有成王三昧衆經同論此二義而互有廣略今經略明正助意也實法境又二初從身僞下十行半約苦果論境二從從諸因緣下七行偈約集因論境觀此苦集而起道滅若能見四諦則得斷生死生有既盡已更不受諸有云苦境又三從身僞下兩句明生空境次從

六入村落下九行偈明法空境次從身空虛
爲下一行結上生法二空境是身虛僞爲生
空境者攬陰成身計有我人衆生壽命身見
得生若體其生名虛僞則求身叵得身見不
起餘知見亦寂故約假身爲生空之境又檢
此身原由一念妄想託父母遺體假名之始
也此赤白二滌色陰也覺苦樂受陰也想此
苦樂想陰也具三性行陰也識於中住識陰
也又精血是地大濕是水大煖是火大氣命
是風大四大圍空是空種心依此住是識種
此實法之始也九觀此身與名依妄六僞法豈可
爲真故言虛僞空聚者身名積聚如水上海
圍空而起泡名亦起起即有滅泡名亦滅無
明業力託父母體即陰泡起陰泡起即身名
起陰泡滅則身名滅故言空聚也從六入村

落下明法空境何以知之此文但細檢根塵
不論人我故知是法空境文爲三初一行明
六根次三行明十二入次五行明十八界六
入者六根也能生於識名之爲根塵之所趣
名之爲入亦爲識之所入故名六入也檢其
元初但有三事謂命燻識如凝酥薄酪七日
一變巧風所吹開張五胞攬四大淨色結成
眼耳鼻舌身等諸根若立則有生識之用是
爲開色爲五心但爲一識依根住故名爲村
塵從此入故言結賊所止眼見耳聞鼻嗅舌
嘗身觸意緣各有所伺不得相濫故言各不
相知也從眼根受色下明十二入更開色爲
十并一入少分開心爲二成十二入也塵入
於根根亦入塵互相涉入通名爲入根生識
強別名爲根塵汗義強別名爲塵當一根塵

互相涉入故言各各自緣他根不入此塵此塵不入他根故言不行他緣也從心如幻化下明十八界更開心爲八色爲十界者隔別不濫名之爲界文爲三一心如幻化下明識徧諸根假令眼耳不對於塵心亦追緣預念故言馳騁如人坐馳天下以愚癡故不知根塵空險故爲賊害如大經云二心常依止下明識常在根故言六根識常在塵故言境界若謂識不在根塵那忽即對即覺以即覺故故常在根塵釋論云根不壞心欲聞復有聲衆緣和合故得聞即此義也三心處六情下明識之於根乍出乍入如鳥在網出入間關啄一捨一周而復始無暫休息識在根網亦復如是或在於耳或在於眼去還無定雖復無定而得論常在云從身空虛僞下一行是

第三結上生法二空境也身空不可長養結上生空境長養是十六之一長養既空十五亦空即是結成生空境也亦無正主者結上法空境遺教云此五根者心爲其主此明託胎之始心在諸根之初名之爲主其實不能控制諸根根大相違心爲受惱身病時心亦隨病寧得是主邪或時更互論主如地具四微則鈍爲水所制水但三微爲火所制火但二微爲風所制風有一微爲心所制心無有微故得爲主復爲四大所惱主義不成故言無正主也無有諍訟者若計有四大則有相違如四蛇相陵四國相拒可有諍訟今觀四大空不能得空便故言無有諍訟也此是結上法空之意也從諸因緣和合而有下七行偈約集因明境即是集諦文爲三初兩行明

集起相次三行半明集相吞噬次一行半明
 集善惡境前三是慧行後一是行行前三是
 正觀境後一是助道觀境前一從無明生後
 一從無明滅若直論生滅者未異小乘無明
 本不生而生不滅而滅生滅不二而二爾從
 諸因緣者苦集第九通從因緣欲明集義須作集
 之因緣釋也前三句假名起之因緣後五句
 實法起之因緣小乘破四大至鄰虛細塵從
 細塵則有麤塵用此為起假實之因緣今明
 麤可析盡細塵亦盡麤細俱盡將何物作因
 緣言因緣者無明內惑為因不了生法二空
 故染愛於外為緣觸處染著故無明潤愛集
 業得起故言從諸因緣和合故起以業起故
 則有一念託胎招於苦果此一念託胎由無
 明愛能生之心既是虛妄所生之心亦是虛

妄討其本末能所都虛故言無有堅實也妄
 想故起五句明實法起之因緣由妄想不了
 一念託胎五陰得起也業力機關者善惡業
 是機關主色陰是機關具受想行陰於中動
 作去來進止以自娛樂識陰依六入住故言
 空聚四大所造故言成立也隨時增減共相
 殘害者豎論增減者如涅槃十時別異從歌
 羅邏時名增壯時名盛老時名減橫論增減
 者火增水減水增火減風地亦爾又念念生
 滅生是增滅是減又新諸根生故增故諸根
 滅故減又下文云隨其時節共相殘害九春風
 夏火秋地冬水增減云譬如四蛇初在篋時
 名生四蛇力敵名壯互相強弱名病蛇鬪困
 暫息不動謂為調適息已復鬪蛇羸如老蛇
 絕為死如是增減此是果身如此由乎集業

四分等如地瞋如火欲如水癡如風此四分
互相違瑞應云貪欲致老瞋恚致病愚癡致
死例云等分致生集業相噬致令四大增損
云云同處一篋者此明篋同性異蛇有螫毒四
大有八萬四千煩惱為害義同大經以假身
為篋身持四大如篋貯蛇篋壞則蛇去身滅
則大亡如鳥在籠云云又用業力為篋業持四
大業謝則大散如鳥在籠處處求出心鳥亦
然未曾一念繫在身篋恒常外馳此則念念
求死非安身道也其性各異者二上升是陽
二下沉是陰何故相違猶其性別性別那能
和合成身諸方亦二者四大對四方風東火
南地西水北又對四時風春火夏地秋水冬
東與南屬陽而上升西與北屬陰而下沉故
言二上二下諸方亦二若相對論者東上西

沉南升北降若論四維者東方帶兩維一維
陽上一維陰下餘三方亦如是或言一根中
具四大二上二下云云悉滅無餘者初見散滅
謂言風火向上地水向下比至上推不得於
風火下檢不見於地水故言悉滅無餘也苦
果升沈碩異由於集業善惡天平云云心識二
性躁動不停者釋論云心意識一法異名對
數名為心能生名為意分別名為識又言有
異前起為心次起為意後了別為識例如意
識不得為一二性者心有善惡性異意之與
識亦有善惡性異故言二性也躁動者心前
起時亦與數俱意識後起亦與數俱故言躁
動又如四大壞時善惡業爭牽不知從誰故
言躁動但此業未謝心常覺觀況復業牽寧
不躁動有熟牽強牽此世雖行善先世惡業

熟既與時合即受惡報故言熟牽強牽者人
雖行惡臨終之時善心猛盛即隨善上升熟
牽強牽彌顯躁動亦是隨業所作而墮諸有
云水火風種散滅壞時下二行明業謝棄苦
器也氣命盡是風去故言散燻盡是火去故
言滅水盡則身爛故言大小不淨盈流於外
地散滅是骨肉離解故言如朽敗木大小不
淨者身為大四支為小足支為大手支為小
手為大指為小如是轉轉作大小皆悉臭穢
不淨盈流此名助道若正觀降伏煩惱煩惱
不伏當修不淨助破欲心釋論云三解脫是
涅槃門道品是開門法不淨九想等是助開
門法不淨是破欲初門若進修背捨及大不
淨已身他身一身多身一國多國山林石壁
一切依正皆悉不淨即雖未爾想力若成怖

第九

十一

畏心起能大助道開發正慧大經云不淨觀
亦實亦虛能破煩惱故名爲實淨言不淨是
故爲虛此不淨觀亦具生法二空大經云諦
觀白骨一一支節何者是我八色流光亦復
無我我不可得即是生空鍊骨人八色不見
四大無有於實即是法空此就助道明於生
法終成正道爾從善女當觀下二十一行是
第二明生法二空觀文爲二初八行半明修
因生法二空觀次十二行半明果成起用因
中又二初三行半約苦集明生法二空觀次
從無明體相下五行約十二因約明生法二
空觀約苦集又二初從善女下一行半明衆
生空次從如是諸大下二行明法空問四諦
十二緣是二乘法云何是菩薩觀門卷四諦
十二緣通是三乘觀境譬如大道貴賤同遊

不可羣小行之而判屬民庶通意云何涅槃
云我昔與汝等不見四真諦云云又云凡夫有
苦無諦聲聞有苦有苦諦菩薩解苦無苦而
有真諦諸佛如來有真有實所以然者二乘
觀有量四諦菩薩觀有量無量四諦大經云
十二因緣凡有四種下智觀故得聲聞中智
觀故得支佛上智觀故得菩薩上上智觀故
得佛菩提復有別意大品云十二因緣獨菩
薩法如佛昔爲儒童雖行衆行非波羅密見
然燈佛得無生法忍一念相應習應苦空乃
至習應滅空習應無明空乃至老死空諸相
應中空相應最爲第一以空導行皆名波羅
密以得無生法忍故佛即與記當知菩薩豈
不觀於四諦十二緣邪二乘雖復同觀觀法
有異聲聞觀諸果總作一苦諦觀觀諸煩惱

石九

十二

及業總作一集諦觀又苦之與集總是現在
所以名總相觀也緣覺觀苦爲七現在五未
來二觀集爲五過去二現在三別觀三世別
開苦集故言緣覺別相觀也雖復總別有殊
同是自調自度同是析生法二空觀爾與菩
薩有異菩薩爲衆生修四等六度觀四諦十
二緣作生法二空今舉譬喻之如握五指成
拳若一指一拳應有五拳若一指無拳五何
得有我人亦爾攬五陰成衆生一陰有衆生
應有五衆生一陰無衆生雖五亦無即陰求
衆生不得離陰求衆生亦不得雖求拳不得
拳不妨有皮骨之指存雖求人不得人不妨
有五陰之法在二乘人得生空時未能知法
空更須析指皮肉骨髓分分推求亦不得指
地水火風窮逐鄰虛亦不得色前念後念亦

無想受求指不得指始知指無求法不得法
方知法虛既不得生法二空境亦不得生法
二空智通菩薩觀亦然是為菩薩二乘析生
法二空相如此但有自行為他之異云云若論
別菩薩體空與其求異如見鏡拳懸體既虛
不勞尋檢鏡拳既虛鏡指非實鏡內拳指既
是虛鏡外拳指亦非實衆生亦爾但有名字
名為衆生此之名字本來自空非檢後空名
既假名法亦非法體名即體法如大品云我
性如色性色性如我性今世生法由無明行
五果既虛二因寧實下文云本性空寂無明
故有無明既寂從無明生寧得不寂雖不得
生法二境而能了了通達二境不為境所染
雖不得生法二空智而能了了通達二空智
不為智所淨非染非淨雙亡二邊正入中道

第一義諦而能雙照二諦三諦朗然非前非
後一時大覺與此甚深法性相應金剛寶藏
具足而得是為菩薩體生法二空觀諸小乘
師雖說析空同外道義何者析色極至鄰虛
或存塵不破或破塵令盡若存不破祇是常
見若破塵盡祇是斷見斷常宛然非邪何謂
諸大乘師雖說體空同於小道何者單用體
慧不能一念空心遊戲神通淨佛國土具足
解釋佛之知見何能三智一心中得五眼具
足而成菩提耶似小乘壞法人無三明六通
願智頂等祇是慧解脫人而已非小何謂今
經首軸窮深極廣序品云遊於無量甚深法
性空品云求於如來真實法身捨身品云求
於寂滅無上涅槃豈可用世人邪見豈可用
小乘之析豈可用大乘師之體解此空義邪

善女當觀下一行半明生空觀初一句對告
勸發次一句指上境次四句正作觀善女者
菩提樹神也諸佛說法必有對揚寄一以訓
衆故告其人也又時衆機緣宜在善女若聞
對告宿善發生又男天表方便女天表智度
欲說智度破於愚著故告女天也又佛在道
樹得道欲說此道故對告樹神也此是表四
悉檀對告非無因緣也當觀者勸一人以例
諸一切菩薩必須修於智度無有菩薩不由
此者故言當觀也諸法者指上四諦十二因
緣若假若實二空境也名目雖略攝法則徧
故言諸法也如是者正明總觀也如是有三
義謂如事如理如非事非理如事者如助道
假想不淨流溢也如理者如生法二空無法
也如非事非理者如法性法身也又事即如

理如非事非理非事非理亦即如理亦即如
事理即如事亦即如非事非理三法不一異
故言如是三法亦一異故言諸法何處有人
者點出理觀也何處者若色處有人則不須
四陰若色處無人四處亦無人五處都無人
故言何處有人又果處既無人無明行因處
亦無人因果合亦無人離因離果亦無人故
言何處有人也人既無衆生十六知見等皆
無故言及以衆生也本性空寂者點出非事
非理觀也本性無事亦復無空十五空本空事既
其無事空何所空無事故事寂無空故空寂
本性如此非今始然故言本性空寂也無明
故有者點出事觀也若其空而復空那得此
事既有事即有空既有空即有非事非理此
之三種悉由無明故有以有無明癡故有行

有行即有生法既有生法即有助事之觀助
來助正即有空理之觀正助顯本即有非事
非理之觀是事不知名爲無明淨名云從癡
有愛則我病生病生故則有藥起即此義也
若知無明本性空寂尚無無明那得事理非
事非理畢竟清淨故稱空慧也但我見深重
爲學道大障凡夫所作恒與我俱我行我住
坐卧言語無離於我我行施戒乃至我行智
慧若攬他遺體而計我者此我疏鈍若執法
塵而計我者此我密利如執一法謂我知我
解於法起我隨執一句是實餘皆妄語即是
邊見非道謂道即是戒取非理謂理即是見
取不當謂當即是邪見自是陵他即慢撥之
即瞋譽之即愛破之即疑不了即癡十使煩
惱以我爲根本不自覺知日夜增長縱令世

智辯聰如長爪鏃腹難石石裂難樹樹折難
水水竭難火火滅去道彌遠假令隨禪梵世
極至非想我心常在將出復還如此凡邪尚
無暖法那能破我廣說此我即二十種身見
謂即陰計五離陰計五我中有五陰陰中有
五我是爲二十諸九若一陰是我餘陰無我若併
是我即有五我是義不然若離陰有我既離
於陰我是誰我是義不然若陰中有我是則
陰盛於我如器盛果如屋貯人是義不然若
我中有陰則陰在我內是義不是是爲破二
十種身見此約外境作如此說而其內心猶
計有我復當反觀即智有我離智有我我中
有智智中有我是義皆不然復破二十種身
見內外合數即四十種身見是名生空毗曇
云我見是共等因我見起時未動身口因我

見後生思惟時方動身口斷我見已悟衆生
空成論明我見心即思惟能動身口斷我見
已即悟衆生空亦悟法空大乘明我見即具
諸法可不具於思惟悟衆生空即是悟實法
空破二十種身見通上三句皆通用之若即
事而理何處有人即陰離陰陰中無人人中
無陰二十種見破故言何處有人能觀之智
智即是人離智有人人中有智智中有人此
計亦破故言何處有人若作非事非理本性
空寂觀者本性空寂本無即陰離陰陰人人
陰既無如此計破故言何處有人能觀之智
本性亦寂故言何處有人若作助道不淨觀
時若觀惡心取境即是汙穢五陰若善心慙
愧即是方便隱沒五陰是見皆依色色即不
淨以不淨故無人無我故言何處有人能觀

增九

十七

觀智亦復如是故言何處有人若得悟爲論
破二十種身見是得衆生空無復見惑而作
二十種觀者除於實惑實惑若除即入修道
即應言何處有法若未悟爲論者雖作二十
種觀見惑未除而於假名上伏受度入實法
計我故法華云衆生處處著捨一取一如屈
步蟲須實法上更作二十種觀使空慧分明
處處作无咎從如是諸大下兩行明實法觀
上生空得悟即解於法爲未悟故更說爾文
亦爲三初兩句即法而空次一行一句即法
本性非空非假次一句即法而假例如生空
三意也如是諸大者標四大法也一一不實
者正明空觀也若四大各守其性者地守堅
性不應動不應煖水守濕性不應冰不應波
火守熱性不應貞不應燄風守動性不應持

不應觸壁而止一大既有三性非都堅非都濕非都熱非都動失本性故則是不實不實故空請觀音云地無堅性水性不住火從緣生風性無礙一一皆入如實之際即其義也上檢生空故言何處有人今檢法空故言一不實不實者即空也本自不生者即法本性不生不滅非空非假觀也體其元不生中無和合末亦不空元無四大四大何得而生元既不生中那和合四大既不和合寧得五陰和合大陰既不和合那得法空本自不生不滅非是觀智令其不生不滅即事而理此之謂也以是因緣者觀解因緣也觀與理冥達即空即假即中大經云亦有因緣因滅無明即得熾然三菩提燈即因緣義也和合而有者即法而假也既本體不實那得大陰此

卷九

十八

由無明業因託今世遺體果故有四大五陰即是迷惑因果和合而有此法有故體有非有亦非有非非有即空即假即非空非假三觀明文在經寧不信邪更爲鈍根人作實法惑相或謂四大五陰是有是無是亦有亦無是非有非無四執既生生名爲有是見依色依色起我我生五利爲法恚怒復起五鈍十使是集方招來苦來世不了展轉無窮生死大海潦水波濤世世常爲大陰所惑惑此色法即色陰憂喜是受陰取相是想陰起善惡是行陰分別是識陰陰心起故名爲有法非法空也心不依色亦復不依受想行識寂然滅衆惡無量衆罪除如是尊妙人則能見般若亦是甚深法性金光明中而得見我釋迦牟尼行人若能如此觀生法二空則是懷璧

向本一世兩世能有所辦保不孤然矣從無明體相下五行明十二因緣生法二空觀文爲二初三行出境相後二行出觀相初二初二行明生空境故文云名曰無明釋論云誰老死故知是生空境也後一行出法空境文云老死愁惱釋論云是老死故知是法空境也然十二因緣經論不同或三世或果報或一念或十種三世者過去二因破神常之見現在五果破神我之見現在三因未來二果破神斷之見常途所用果報者初託胎歌羅邏時爲無明一期始終論十二支也一念者華嚴云十二因緣在一念心中大集云十二因緣一人一念悉皆具足如眼見色不了名無明生愛惡名行是中心意名識色六識行名名色六處生貪名六入色與眼作對名

觸領納名受於色纏綿名受想色相已名取念色心起名有心生名生心滅名死乃至意思法亦復如是一日一夜凡識幾許十二因緣輪網以自纏迴今更說其因起之相若觀名色由行行由無明於無明不了或謂有謂無亦有亦無非有非無作四句取者皆是無明是事實是行是中心意名爲識識共色行名名色一一如前說又觀一念託胎是名色五胞開張名六入六入對塵名爲觸領納名爲受於此受中作四句分別或有受無受亦有亦無受非有非無受如眼受色於色不了是無明愛惡之心名爲行識共色行名名色六處生貪名六入餘如上說乃至意思法不了是無明愛惡是諸行餘如上說如此推十二因緣大樹枝條布濩徧覆三界誰能識邪

誰摧伐邪今經既是略說不論三世一念等但舉生法爲二觀之境宜以譬顯如捉火燼闇中舞之圓輪相續團團不斷火者實法也輪者假名也衆生長夜著於假名舞燼不息迷於陰入薪火不息十二因緣何由可盡若知輪依於火止手則無輪火賴於薪除薪則無火輪火雙無生法二空也生空境文例爲三無明體相兩句明本性不有不無是中觀境妄想因緣和合而有此兩句是假觀境無所有故兩句是空觀境是故我說兩句結成爾行識名色一行明法空境例應有三特是文略得意可知衆苦行業下明生法二空觀文亦三意衆苦行業不可思議一行明非空非有觀本無有生亦無和合兩句明空觀上句本無有生是生空下句亦無和合是法空

也不善思惟兩句明假觀前不善思惟致今名色今不善思惟復有未來老死云云雖名爲生法二空觀即空即假即中其文炳然明與義會何所疑哉更爲鈍人說空觀相若假名自生不須實法若由法生非假名生若假實合生應有二假若離假實則無是處今之假名但有名字名字不在內外兩中間亦不常自有以不可得故是名觀假名空觀實法空者若名色自生不應待業若業能生羅漢有業何故不生若業果共生各有名共各無寧共若無因緣生則無是處既不得生亦不得生亦不得滅亦不得非生亦不得非生非不滅亦不得非滅非不滅無滅無生名爲無生無生故假名壞假壞故則六十二見壞見壞

第九

十一

故實亦壞既不然火是則無煙日中舞燼是亦無輪是略示空觀相中觀假觀在別記云云我斷一切諸見纏等下十二行半偈是第二果上生法二空用明觀成證果文爲二初三行半自行成後九行化他成自行文又二初兩行智德滿次一行半斷德滿一切諸見者六十二見八十八使等故言一切此是生空觀成也以智慧刀者譬智慧利用上譬斷見下譬斷煩惱纏者別明十纏煩惱網者通明十使網有羅籠之失含有覆闍之過達陰空寂闇障不能蓋裂網破壞羅罽不能礙此是法空觀成也二乘所斷是通見纏菩薩所斷是別見纏淨名云結習未盡華即著身未斷別見爲華所著也而言佛斷見纏者若通若別究竟盡在於佛也釋論云衆生無上者佛

是法無上者涅槃是無上假實佛地所不惑故言斷爾經論不同或言佛上上智斷下下惑無明力大佛智能斷一念相應慧正習俱盡無有餘或言有上士者名之爲斷無上士者名無所斷斯乃隨國隨時隨人隨悟皆有利益云云證無上道者生法二空正道滿也微妙功德者生法二空助道滿也開甘露門下一行半明斷德滿甘露是諸天不死之神藥食者命長身安力大體光譬諸佛斷德佳大涅槃眞常樂我淨用知是斷德滿也然此義意復欲通對華嚴諸位開甘露門對十住位初開聖道遮二邊故言開也示對十行歷別顯示也入對十迴向迴事入理也處對十地處法性室也食味對妙覺自食斯味兼以被人下地非不化他自行未圓化亦不廣佛

地果圓斷德已滿慈悲力大能爲衆生開於
十住示十行入十向處十地食甘露味功用
具足斷德化他兩義皆成也又通對般若四
智開對道慧示對道種慧入對一切智處對
一切種智食味對佛住大涅槃以大悲令衆
生得此四智於果地斷德義亦無妨云云又對
法華開示悟入佛之知見良由佛德圓滿能
以大事因緣出現於世開示衆生佛知見也
於斷德義亦顯又涅槃云常樂我淨於果斷
最便如前釋云云吹大法蠶下九行明果地化
他滿文爲二初兩行轉法輪化他次七行四
弘誓願化他說法又二初一行說法次一行
神通餘經前神通駭物開後說法今經後神
通成前說法爾修因時生法二空之正慧得
果時智德滿故能說法化他修因時生法二

攝九

十三

空之助道得果時斷德滿故能神通化他說
法舉四譬者聞法之益實自無量略舉四譬
別有所擬吹蠶是改號譬佛說小乘法改凡
夫苦忍之凡性入聖人之正性說大乘法改
凡聖之偏性入中道之圓性通教七地別教
初地圓教初住皆是改號之位從偏以入中
也擊大法鼓者擊鼓誠進肅衆前驅此譬佛
說法督進深行小乘位在修道通教在八地
別教在十行圓教在初住此諸位以聞法力
咸進真修道也然大法炬者炬能自照亦能
照他譬佛說法令自他雙益如千年闇室一
燈能了又如一燈然百千燈聞法之力自他
俱益亦復如是通教八地別教十迴向圓教
亦在初住皆是道觀雙流自他俱益之位也
雨勝法雨者雨能成熟農夫加功扶疎益寡

時澤一降華果敷榮喻如衆行雖復勤修發
趣事弱聞佛說法增道損生任運成熟自然
流入薩婆若海如大恒中船不勞筋力疾有
所到此並在雙流位中義如上說若得此意
例華嚴之四位般若之四智法華之四知見
涅槃之四德皆可解此一法豎擬諸經之位
橫論一切諸位一聞法音隨類各解云此中
四譬皆言大者說大法也通途解釋明大非
小位爾我今摧伏下是神通化他也怨結者
四住是二乘怨結五住是菩薩怨結魔爲煩
惱主伐樹去根化物須降主若不降魔化道
不暢降魔之法須用神通譬如勝怨乃可爲
勇非法王不壞法王勝者是時化道得立爾
豎法幢者法幢三昧也高出衆行爲衆行之
望如兵望麾也三德不縱不橫故言微妙從

攝九

三十四

度諸衆生下七行是四弘誓願化他雖復成
果本願未休故言四弘益物亦名四諦益物
四弘是誓願之心四諦是所緣之境也度諸
衆生是初弘誓亦是未度苦諦令度苦諦也
從煩惱熾然一行是第二弘誓亦是未斷集
諦令斷集諦也從我以甘露下一行是第四
弘誓亦是未證滅諦令證滅諦也從於無量
劫下四行是第三弘誓亦是未安道諦令安
道諦也此中指檀爲四諦檀對於慳慳貪自
蔽是集集業招果是苦檀能破慳是道慳滅
是滅諦無量劫者積功高也遵修諸行者攝
法廣也論云檀義攝於六云捨身命財與後
際等得不壞常住名波羅蜜豎高橫廣故言
遵修諸行也

金光明經文句卷第四

音釋

塊苦恠切 棧房越切 噬時制切 需乃管切 騁丑郢切
 控苦貢切 篋詰叶切 噬時制切 歌溫也 羅荒語也 邏此云
 督都毒切 濩胡故切 嬴瘦弱也 燼徐刃切 暴盧戈切 躁到則
靜不安 箱屬 胡故切 布也 徐刃切 暴盧戈切